



ITA TUIR JEZÚS IHA DALAN KRUIZ NIAN

Kuarezma mak tempu grasa espesial nian, tanba prepara sarani sira ba tempu ne'ebé importante liu: Paskua. Tempu Kuarezma nian tulun sarani sira atu tama kle'an liutan iha ita-nia fiar nia mistériu boot liu: Jezús nia mate no moris hi'as.

Iha tempu ida ne'e, ita hakarak tulun oratorianu sira atu sente Jezús nia domin forte oinsá, hodi fahe ema seluk, liuliu labarik no foin-sa'e sira seluk, nia terus, nia pobreza, nia moras. La presiza ba dook, tanba iha rai Timor mós ita bele hasoru realidade sira ne'e loron-loron. Tan ne'e, ita sei oferese oportunidade ba oratorianu sira, atu hakbesik sira-nia maluk sira ne'ebé iha susar ka moras laran, no mós sei hakbesik sira ba labarik no foin-sa'e sira nia realidade iha nasaun seluk.

IKONE

Iha tempu bailoron tinan 1854 iha Turin hahú moras colera, moras todan ida ne'ebé fasil atu hada'et. Entre ema sira ne'ebé mate tan moras ida ne'e, liu metade hela iha Borgo Dora, bairro besik Valdocco. Ema hotu ta'uk, taka loja sira, sira ne'ebé iha família iha foho halai ba ne'ebá, dala ruma, se ema haree parenti ruma ne'ebé moras, husik nia mesak no halai. Administradór lokál organiza fatin ida atu simu ema moras sira, maibé la iha ema barani atu ba tau matan ba moras sira.

Dom Bosco ko'alia ba sira ne'ebé boot liu entre foin-sa'e sira, (entre sira iha mós Miguel Rua no João Cagliero) no esplika ba sira katak Administradór lokál interpela ema di'ak sira iha sidade atu bele sai enfermeiru ka asistente ba moras sira. Se sira ruma hakarak hala'o obra karidade ida ne'e nian, nia agrade se sira iha Maromak nia naran. Fou-foun na'in 14 oferese an, maibé, tui mai, iha na'in 30 tan, ne'ebé fó an tomak ba "misaun" ida ne'e ho aten barani no espíritu sakrifisiu nian hodi simu respeitu husi ema hotu iha sidade. Loron 5 agostu, festa Maria Virjen Neve nian, Dom Bosco dehan ba foin-sa'e sira: "Ha'u hakarak katak ita tau klamar no isin iha Maria nia liman... Se imi hotu sei moris iha Maromak nia grasa, se imi sei la halo sala mortál, ha'u promete ba imi katak ema ida sei la kona colera". Loron hirak ne'ebá manas liu, servisu todan, iha perigu laran, dois para mate. Ema hirus no tuda fatuk ba Miguel Rua (tinan 17) ne'ebé koko atu tama iha fatin ne'ebé halibur moras sira tanba ema sira hanoin katak atu oho moras sira. João B. Francesia haktuir: "Dala barak ha'u presiza fó aten barani ba sira ne'ebé boot liu ha'u, tanba sira ta'uk katak ema sei oho sira. João Cagliero (tinan 16) sei serbí daudaun moras sira hamutuk ho Dom Bosco, bainhira dottor ida hakbesik Dom Bosco no hateten ba nia:

"Labarik ida ne'e la bele hela iha ne'e, Dom Bosco la prudente liu!". Dom Bosco hatán: "Lae, lae senhor dottor. Ami na'in rua la ta'uk moras ida ne'e, nune'e sei la mosu buat ida ba ami". João B. Anfossi fó sasin durante Dom Bosco nia Prosesu Beatifikasaun nian: "Ha'u hetan sorte atu bele akompaña Dom Bosco dala barak, bainhira nia vizita moras sira. Ha'u-nia tinan 14 no, ha'u sei hanoin hetan katak ha'u sei hakmatek hela atu hala'o ha'u-nia knaar nu'udar enfermeiru, ha'u konfia katak ha'u sei soi ha'u-nia moris, ha'u konfia tanba Dom Bosco fó esperansa ba alunu sira hotu". Bainhira hahú udan tau, moras ne'e para ona: la iha Dom Bosco nia foin-sa'e voluntariu ida ne'ebé kona moras kolera!



Pergunta atu halo oratorianu sira refleto:

- ⇒ Dom Bosco la ta'uk atu envolve foin-sa'e sira iha ninia atividade, maski susar no todan: iha atividade ruma ne'ebé ita sente katak ita bele fó ita-nia kolaborasaun no tulun?
- ⇒ Dom Bosco husu ba foin-sa'e sira atu moris iha Maromak nia grasa no konfia iha Na'in Feto nia tulun, tanba la bele komprende ema nia terus no susar se ita nia fuan la besik Maromak. Ita hatene reza ba ema hotu ne'ebé presiza tulun no ita harohan ba Maromak atu tulun ita "haree" no halo buat ruma ba siraa ne'ebé iha susar laran?



JOGU

Halimar iha liur hodi fahe oratorianu sira ba grupu rua, iha ne'ebé grupu ida hamriik iha sorin loos, ida fali iha sorin karuk kampu nia; bainhira jogu hahú, sira ne'ebé iha sorin loos tenke halai ba sorin karuk no sira ne'ebé iha sorin karuk tenke halai ba sorin loos. Iha klaran iha animadór ka jogadór ida ne'ebé halo "manu-makikit" no hakarak "han" jogadór sira ne'ebé halai atu hola sira-nia fatin foun. Bainhira jogu hahú, grupu sira iha pozisaun la hanesan: ez: grupu A hamriik, grupu B hahú hodi toba iha rai. Hu tiha arpitu tiha, sira hotu halai ba fatin foun ho kuidadu atu manu-makikit la kaer sira. Sira ne'ebé manu-makikit kaer, sai sai mós manu-makikit no tulun atu kaer kolega sira.

To'o sorin seluk sei sura ema na'in hira mak to'o fatin. Hafoin hahú fali, maibé agora, grupu A mak hahú hodi hakne'ak no grupu B hamriik. Prosesu hanesan nafatin.

Bele ba-mai dala hira ita hakarak no mós animadór bele hili pozisaun atu hahú hodi fó nafatin ba grupu ida pozisaun hamriik nian, ba ida fali pozisaun komplikada uitoan.

Bainhira jogu hotu ona, tulun oratorianu sira atu refleto kona-ba jogu ida ne'e: oinsá pozisaun atu hahú bele influénsia rezultadu, nune'e mós, iha ita-nia moris, akontesimentu no situasaun sira bele halo ita hetan susar atu to'o objetivu sira ne'ebé ita hakarak. Ida ne'e mós, presiza halo oratorianu sira sai sensível hasoru sira ne'ebé moris iha kondisaun ne'ebé la permite atu espresa sira-nia kapasidade tomak (kiak sira, aleizadu ka ema moras sira...)

SELEBRASAUN

Tempu Kuarezma nian mak tempu Via Sakra nian: sesta- sesta ita hatudu ba Jezús ita-nia dezeju atu la'o iha dalan terus no susar nian hamutuk ho Nia no ho Ninia atitude sira. Iha pajina ketak, bele hetan Via Sakra simples ida ho Maromak nia liafuan.

